

Protesta ekintza ugari izan dira Mahai Nazionaleko kideen espetxeratzeagatik

LABeko ordezkarien eta Ertzaintzaren artean istiluak sortu dira Bilbon

HBko Mahai Nazionaleko kideen espetxeratzearen aurkako mobilizazio ugari izan ziren atzo Hego Euskal Herriko bazter gehienetan. Goizean, LAB sindikatuko kideen eta irakasleen protestaldiak izan ziren, eta arratsaldean, berriz, eskualde guztietan manifestaldiak.

Erredakzioa / Donostia

HB-KO zuzendaritza osoa espetxerako bidean jarri duen prozesuaren aurkako mobilizazioak ugariak izan ziren atzo. Lehenengo mobilizazioak LABek bultzatutakoak izan ziren. LABek Hego Euskal Herriko lau hiriburuetan giza kateak egin zituen; Donostian, Iruñean eta Gasteizen arazorik gabe amaitu ziren, baina Bilbon liskarrak izan ziren.

Bilbon LABeko 300dik gora delegatuk Gran Vian barrera giza katea egin zuten, eta Bilboko Entzutegiaren aurrean amaitu. LABeko ordezkariak Bake alternatiba espetxeratua. Demokrazia Euskal Herriarentzat zioen pankarta zeramaten. Entzutegi aurrera iristean espaloian jarri ziren, eta hainbat ertzain hurbildu zitzaizkien, ordezkari bati nortasun agiria eskatzeko. Horrek identifikatzeari uko egin zionean, Ertzaintza ordezkaria atxilotzen eta pankarta kentzen saiatu zen, eta orduan hasi ziren istiluak. LABeko ordezkariak eskuak eta oinak erabiliz eta Ertzaintza istiluen aurkako materiala baliatuz aurrez aurre aritu ziren. Ondoren, ertzain gehiago iritsi ziren eta LABeko kideak sakabanatu zituzten. LAB sindikatuak oso gogor kritikatu ditu gertakariok, eta Ertzaintzaren «jarrera bortitzaren ondorioz» hainbat pertsona zauritu direla eta horietako bat ospitalera eraman behar izan zutela salatu du.

Donostian LABek antolatutako



LABek Bilbon eginiko mobilizazioan Ertzaintzarekin istilu gogorak izan ziren.

TXEMA FERNANDEZ / EFE



Donostian Ertzaintza ikasleen manifestaldiari oldartu bazitzaion ere, azkenean egin zuten manifestaldia.

EDURNE KOCH

giza kateak, antolatzaileen arabera, 500 pertsona inguru bildu zituen. LABeko delegatuak, Rafa Diez idazkari nagusia tartean, Amaratik abiatu ziren, eta erdialdeko kaleetan barrena ibili eta Alternatiba demokratikoaren hainbat ale banatu ostean, Do-

nostia Justizia Epaitegiaren aurrean kontzentrazioa egin zuten. LABeko ordezkariak Donostiako Entzutegira iritsi zirenean, bertako hainbat langile, epaile eta fiskal kontzentrazioa egiten ari ziren, ostegunean Errenteriako Bake Epaitegian izandako

erasoa gaitzesteko. LABeko kideak pareko espaloian jarri ziren. Askatasuna eta demokrazia Euskal Herriarentzat zioen pankarta batekin zeuden HBko hainbat kideren ondoan. Ordu erdi iraun zuen kontzentrazioak.

Iruñean 200 pertsona inguruk hartu zuten parte LABen mobilizazioan, eta polizia inguratuta joan ziren arren, ez zen istilurik izan. Gasteizen ere 100 pertsona inguru bildu ziren eta ibilbidea inolako arazorik gabe.

Ikasleek ere goizean egin zituzten mobilizazioak. Ikastetxe askotan greba egin ostean, manifestaldiak egin zituzten. Leku askotan Ertzaintza eta Polizia Nazionala oldartu egin zitzaizkien manifestatzaileei. Donostian, esaterako, manifestaldia hasi bezain laster, Ertzaintzak bildutako 500 gazteen aurka ekin zion. Gazteek ondoren berritoki eratu zuten manifestaldia, baina ertzainak etengabe izan zituzten atzetik.

Gaualdean eskualde guztietan egin ziren Mahai Nazionalaren espetxeratzearen aurkako manifestaldiak, eta hainbat herritan istiluak izan ziren. X

'Alternatiba demokratikoa' ezagutarazteko urratsak sustengatzen dituztela azaldu dute HAK eta EBk

■ AABek Maroñoko taldeen iritzia jakin nahi dute HBko kideen presondegiratzeari buruz

H.G. / Baiona

HERRIAREN Alde eta Euskal Batasuna Ipar Euskal Herriko alderdi abertzaleek adierazi dute sustengatzen dituztela Herri Batasunak Alternatiba demokratikoa ezagutarazteko eman dituen urratsak. Bost kideen presondegiratzea salatu ondoren, bake proposamenari presondegiarekin erantzutea «adierazpen askatasunaren errespetatzea» ote den galdegin dute.

«Euskal Herriko problema politikoei erantzun politikoak emateko ordezkari, Espainiako Es-

tatuak beti nahiago du errepresioa erabili. Aterabideak proposatzen dituztenak zigortuz, errepresioa emendatzea baizik ez du egiten, eta horrek bere ezintasuna agerian uzten du», adierazi dute HA eta EBk. «Espainiako demokrazia gaztea deituaren berritoki bagenuen; tortura, GAL, preso sakabanatzea eta beste. Orain itxura gordetzera ere ez da entseatzeko, eta alderdi politiko bateko arduradunak ekimen politiko bategatik presondegiratzen ditu». HA eta EBk «elkartasun osoa» adierazi diote Herri Batasunari, «gatazka» negoziatuz bai-

zik ez delako bukatuko».

Ezkerreko Mugimendu Abertzaleak, berriz, «polizi neurrien ondorengo justizia aparatuen aldi dela ohartarazi du, eta zuzenbidearen «manipulazioa» gaitzetsi.

Maroñoko taldeen iritzia • Amnistiaren Aldeko Batzordeak Maroñoko talde bakezaleen iritzia galdeginen duela jakinarazi dute. AABek azaldu dutenez, «talde bakezaleek Altsasun hitzartu zuten elkarriketarako itunean bake biderako proposamen oro aztertzea, eta gaur egun dagoen elkarriketa bidezko pro-

posamen bakarrari presondegiratzeari erantzun diote».

Mikel Kortaren iduriko, «egoeira oso larria» da. «Nola hitz egin daiteke elkarriketaz, gatazkako alde funtsezko batek egin duen proposamena baztertu eta zigortzen delarik? Horrek argi uzten du elkarriketarako dagoen borondate eskasa», azaldu du AABetako ordezkariak.

Kortaren ustetan, Altsasun hitzartutakoak zerbaiterako balio ote duen erakusteko unea da, HBko kideen presondegiratzeak onartutako printzipio horiek hausten dituelakoan. X

Libre gelditu dira Hernanin atxilotu zituzten bi lagunak

■ Epailearen aurretik pasatu gabe askatu zituen Poliziak

Erredakzioa / Donostia

IÑIGO TOLARETXIPI eta Mikel Mendizabal, Polizia Nazionalak asteazken gauean Hernanin (Gipuzkoa) atxilotu zituen bi lagunak, libre utzi zituzten atzo goizean. Entzutegi Nazionaletik pasatzekoak ziren atzo, baina deklaratu gabe utzi zituzten azkenean libre.

ETari laguntza eman ziotelakoan agindu zuen Ismael Moreno Entzutegi Nazionalen epaileak Tolaretxipiren eta Mendizabalen atxiloketa. Ostegun gauean, ordea, aske uzteko agindu zuen epaileak, diligentzia polizialean ez zegoela inolako frogarik argudiatuta.

Atxilotu zituztenean Hernaniko Zingi-Zanga taberna miatu zuten poliziek, han egiten duelako lana, sukaldari gisa, Tolaretxipik. Asteazken gauean atzo goiza arte inkomunikatuta izan dituzte Donostiako komisarian. Amnistiaren Aldeko Batzordeak komunikabideen jarrerak gaitzetsi dute, horietako askok ETako partaidetza jo dituztelako bi atxilotuak.

Bestalde, Jose Luis Lozano Abantoko (Bizkaia) HBko zinegotzia libre utzi zuen atzo Moreno epaileak, Entzutegi Nazionalen deklarazioa hartu ondoren. Lozano ere ETari laguntza eman izanaz akusatatu zuen epaileak, joan den asteazkenean atxiloketa agindu zuenean. X

Erdozainzi eta Agerre Parisera eramantuzte

Hur Gorostiaga / Baiona

MANEX ERDOZAINZI asteartean Jandarmeriak atxilotu zuen gazte donaitiarra eta Didier Agerre ostegun arratsaldean atxilotu zuten gazte pagolarra Parisera eramatekoak zituzten bart arratsean, senideen iturrietatik jakin denez. Bi gazte baxenafartarrei joan den iralaren 23an Irizarriko Jandarmeriaren kontra molotov koktelak jaurti izana leporatzen die Laurence Levert epaileak, eta gaur arratsaldean pasako dira bere aurretik.

Erdozainzi Donaixtin atxilotu eta hiru egunez atxiki dute Jandarmerian. Agerre, Landesetako Air-sur-Adour herrian atxilotu zuten ostegunean, bertan ikaslea baita.

Atzo goizean hogoita hamar gazte joan ziren Pauera bi gazteei sustenguren adieraztera, Gazteriak erakundeak deiturik. Arratsean, berriz, autobus bat zen ateratzeko Donibane-Garazitik Pauera joan eta biei sustenguren adierazteko.

EPSK eta EMAk fermuki salatu dituzte aste honetan izan diren atxiloketak.